



EM

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Sanaartornermi ilinniartoqartarnek pillugu Namminersorlutik Oqartussat nalunaarutaat nr. 10, 12. juli. 2010-meersup allangortinneqarnissaa pillugu Naalakkersuisut peqquneqarnissaannik Inatsisartut aalajangiiffissaattut siunnersuut, taamaalilluni Nalunaarummi pineqartumi neqerooruteqartitsisup neqerooruteqarnissamut najoqqutassani piumasaqaatigineqartut amerlillugit sanaartugassap minnerpaamik 12 mio. kr.-inik naleqarpat ilinniartut sisamat atorfinitsinneqassasut taamatuttaaq sanaartugassaq minerpaamik 15 mio. kr.inik naleqartillugu ilinniartut tallimat atorfinitsinneqassasut.

(Inatsisartunut ilaasorta, Per Berthelsen Siumut)

Tunngavilersuut:

Nunarput suliffinnik misiliiffissanik amigaateqangaarpoq.

“Inuussutissarsiutinik ilinniartitsinerme ajornartorsiut annerpaaq tassa praktikkerfissat amigaataanerat.”¹

Tamanna pissutigalugu inuusuttorpasuaqarpoq ilinniarnermi unittoortartunik, tamannalu nunatsinnut amilaarnaannartumik akisoorujussuvoq.

“Praktikkerfissat 2005-2008-mut amerliartorsimapput, kisiannili 2009-mi ikileriarsimallutik.”²

Ajornartorsiut tamanna iliuuseqarfiginiarlugu inatsisartut inatsisiliornikuupput inuiaqatigiinnullu najoqqutassiortoqarluni, kisianni misilittakkat takutippaat suliniutit naammassimanngitsut, tassami suliffinnik misiliiffissanik amigaateqarneq pillugu sulil erloqivugut.

“Ajornartorsiut alla tassa ingerlatsiviit nunanit allaneersut, pilersaarutininik entrepresinillu suliaqartut, immaqali tamaaniiginnarnissaminut, taamalu praktikkertoqarnissaminut periarfissaqanngitsut.” Taama allaqqavoq qupperneq 157-imi Akileraartarnermut Atugarissaarnermullu Ataatsimiititaliap isumaliutissiisutaani.

Taamaattumik pingaaruteqangaarpoq Naalakkersuisut Inatsisartunit peqquneqarnissaat suliffeqarfiit tamakkua aamma inuusuttortatta ilinniagaqarneranni ineriartortuarnissaannut peqataatinneqarnerisa qulakkeerneqarnissaat pillugu, tamanna pisinnaavoq suliffeqarfiit pineqartut pisussaffilerneqarnerisigut aningaasatigut tapiissuteqartillugit praktikkertoqarnissaanut akitsuummik pisortat tamakkiisumik ilaannakortumilluunniit sanaartortitsinermik

¹ Vores velstand og velfærd – kræver handling nu, skatte- og velfærdskommissionens betænkning, marts 2011; s. 131

² Vores velstand og velfærd – kræver handling nu, skatte- og velfærdskommissionens betænkning, marts 2011; s. 131

neqerooruteqartitsitillugit soorlu tamanna Akileraartarnermut Atugarissaarnermullu Ataatsimiititaliap siunnersuutigigaa.

Suliffeqarfiit arlaat 3 mill. koruunikkaarlugit pisortanit iminneqaruni/suliassinneqaruni tamatigut suliffimmik misiliisut/ilinniartut ataatsimik ilasassagai piumasqaataagalarpoq, kisianni immaqa pisortat aqutsinnginneri/nakkutilliinnginneri imaluunniit paasisimasaqannginneri pissutigalugu ilimanarpoq suliffeqarfippassuit ajornanngippallaamik piumasqaataasut avaquttaraat. Tassami suliffinnik misiliiffissanik ajornartorsiuteqarneq suli annertuvoq.

Taamaattumik tassunga tunngasuni sukaterinissaq qularnaateqanngilaq.

Siunnersuutip aningaasatigut allaffissornikkullu pisortat suliffeqarfiutaannut kingunissai Siunnersuut toqqaannartumik pisortat suliffaqarfiutaannut pitsaanngitsumik aningaasartuutunik kinguneqassanngilaq, soorlu siunnersuummi atuarneqarsinnaasoq siunnersuutip akuerineqarneratigut ilinniartut praktikkerfissanik pissarsisut aningaasartuutigineqarnerat suliffeqarfiit praktikkerarnermut akitsuutitigut akiliinermikkut aningaasartuutit matussuserneqassammata. Siunnersuutip akuerineqarneratigut qitiusumik allaffeqarfissuarmi suliassanngortinneqassaaq, naatsorsuutaavorli tassunga tunngasumik aningaasartuutit killeqarnissaat.

Taamatutaaq suliassap ulluinnarmi inerlatsinermi tulleriiarinermit inissinneqarnissaa.

Siunnersuutip aningaasatigut allaffissornikkullu naminersorlutik suliffeqarfiutilinnut kingunissai Tunngavilersuutit pineqartut aallaavigalugit toqqartumik nalilerneqarsinnaanngilaq siunnersuutip akuersissutigineqarnera sanaartornermi suliffeqarfiutilinnut sutigut nanertuutaassanesoq. Tunngaviusumimmi ilisimaneqarsinnaanngilaq sulisitsisup ilinniartunik atorfeqartitsinera aningaasatigut annaasaqaataassanesoq.

Soorlutaaq ilinniartunik atorfeqartitsineq tamakkiisumik isiginnilluni sulisitsisumut aningaasatigut iluaqutaanissaa naatsorsuutigineqarsinnaasoq.